

**Naalackersuisunut apeqquut: Eqqagassalerineq pillugu pilersaarut 2010-2013 pivirusunngortinniarlugu Naalackersuisut iliuitsinik qanoq ittunik aallartitsippat?**  
(ATASSUT-ip Inatsisartunut ilaasortai: Finn Karlsen, Siverth K. Heilmann, Knud Kristiansen)

**Akissuteqaat**

(Nunamut namminermt, Pinngortitamut Avatangiisinullu Naalackersuisoq)

Naalackersuisut sinnerlugit ATASSUT-ip Inatsisartuni ilaasortaaitaasa apeqquutaannut qujassuteqarniarpunga.

Aallaqqaasiullugu erseqqissarneqassaaq, ullutsinnut naleqquttumik eqqagassalerineq avatangiisinut peqqissutsimuullu illersorneqarsinnaasoq pilersissagipput Naalackersuisut pisariaqartutut isigaat. Taamaattumik Naalackersuisut suleqatigiinnissamut isumaqatigiissutaanni immikkoortoq taanna aamma ilaavoq.

Siunissami Inatsisartut aalajangiineri tamarmik avatangiisinut tunngasortai pillugit nalilersuinernik ilaqartassat suleqatigiinnissamut isumaqatigiissummi ilaatigut takuneqarsinnaavoq. Kommunit suleqatigalugit nuna tamakkerlugu eqqagassalerinermik pilersaarummik pivirusunngortitsisoqassaaq. Tamatumani aamma pisariaqarpoq eqqakkat ikuallanneqartarnerinut pitsaanerumik aaqqiissutissat ugartornissaat aamma kiak sinneruttoq kiassanermut qanoq pitsaanerumik atornerqarsinnaanersoq. Eqqagassanik uumassusilinneersunik aamma uumaatsuneersunik arrotinneqarsinnaanngitsunik atoqqiisinaaneq periarfissaanersoq najukkami aamma nuna tamakkerlugu pilersaarutikkut nalilersuisoqassaaq.

Nassuiaatip UKA 2008-mi suliarineqareernerata kingorna eqqagassat pillugit pilersaarut kommunini pissutsit suut salliutinneqartariaqarnersut pillugit nalunaaruteqarnissaq siunertaralugu aamma suliniutit qanoq naleqqunnerpaamik aningaasalersorneqarsinnaanerinut kommunit qanoq isumaqarnersut pillugit tusarniaavineqaaqippat.

Kommunit erseqqissaatigaat, pilersaarut aningaasatigut kommuninut qanoq kinguneqassanersoq ersarissumik takulertorneqarsinnaanissaa pisariaqartorujussuusoq, tamatumani aamma aningaasartuutit ataatsimoortumik tapiissutitigut qanoq iluarsiiavineqarsinnaanersut KANUKOKA-p aamma Naalackersuisut akornanni isumaqatigiissutigineqartariaqartoq.

Atuisut akiliuteqartarnerat pillugu innuttaasut oqalliseqataanerisa peqatigisaanik suliassamut naleqquttunik atortorissarusersuinissaq pillugu oqallinnerit ingerlanneqassapput, tamatumani aamma ikuallaavinnit kiaap pilersinneqartartup sinneranut apeqquutit ilaatinneqassallutik. Eqqagassat pillugit suliniutit soorunami avatangiisinut inuiaqatigiinnilu aningaasarsiornermut ataqatigiissillugit ilaatigullu ikuallaavinni kiaap sinneruttup atornerqartarneranut tunngasut isiginiarneqassapput.

Taamaattumik ikuallaasarfinit kiaap sinneruttup atorluarneqarnerunissaanut Nukissiorfinnik isumaqatigiissuteqarnissaq pisariaqarpoq

Suliniutit nutaat aallarnisarneqartussat eqqagassalerineq ullutsinnut naleqqunnerusoq pilersinniarlugu, matumani eqqagassat ulorianartut immikkoortiterneqartarnerat ilanngullugu, annertuumik aalajaatsumik ingerlaavartumillu suliffissaqartitsinermik nassataqassapput. Tamatumunnga atatillugu eqqagassaleriffiit nutaat ingerlanissaannut sulisorisat naleqquttumik ilinniartitaanissaat aamma pingaaruteqarpoq.

Naalakkersuisut qularutiginnilaat isumannaatsumik avatangiisinullu ullutsinnut naleqquttumik eqqagassalerinermut anguniagassanik ataatsimoorussanik angusaqarnissaq tamanit piumassuseqarfigineqartoq. Suliassatsinnut allanut tamanut naleqqiullugu eqqagassalerinermi suliniarneq aammattaaq tullerijiarilluni pingaarnersiunermi ilaatinneqassasoq soorunami ersarippoq.

Naggasiutigalugu oqaatigineqassaaq, malitseqartitsilluni peqqussummut naapertuuttumik nalunaarutit nutarterneqarnerat suliarineqarmata.

Naalakkersuisut neriupput ATASSUT-ip Inatsisartuni ilaasortaatitaannit apeqqutit naammaginartumik akisimassallugit.